

Agong sanjung tinggi pengorbanan anggota polis

Oleh JUANI MUNIR ABU BAKAR
25 Mac 2022, 11:05 am



PETALING JAYA: Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah menzahirkan setinggi-tinggi penghargaan kepada warga Polis Diraja Malaysia (PDRM) di atas khidmat bakti dan jasa dicurahkan dalam memikul amanah dan tanggungjawab memelihara keamanan negara dan rakyat Malaysia.

Seri Paduka turut menyanjung tinggi dan menzahirkan setinggi-tinggi penghargaan kepada seluruh warga dan pesara PDRM di atas pengorbanan yang dicurahkan tanpa mengira penat lelah, masa dan situasi.

"Semoga warga PDRM akan terus kental dan bersemangat memberi khidmat demi menjaga kedaulatan, keselamatan, kesejahteraan rakyat dan negara Malaysia.

"Semoga seluruh warga PDRM dirahmati dan dilindungi Allah daripada segala bentuk ancaman dan musibah serta para pahlawan negara yang telah terkorban ditempatkan bersama para solihin," titah Al-Sultan Abdullah bersempena Hari Polis ke-215 yang dikeluarkan oleh Istana Negara hari ini.

Bersempena hari penuh bermakna itu, Seri Paduka menzahirkan ucapan selamat menyambut Hari Polis ke-215 kepada seluruh warga PDRM dan juga veteran dan pesara polis. – UTUSAN